

Notat

Dato: 06.02.2019
Arkivsak: 2018/16486-19
Saksbehandlar: thoare

Til: Fellesnemnda

Frå: Prosjektleiar Rune Haugsdal

Tillegg til sak - reglement for godtgjersle og arbeidsvilkår for folkevalde i Vestland fylkeskommune

I møtet i fellesnemnda sitt arbeidsutval (FN-AU) den 4. februar 2019, vart det reist nokre spørsmål og innspel som prosjektleiar ønskjer å knytte nokre merknader til. Med grunnlag i dette vil prosjektleiar føreslå endring i høve framlagt reglement til FN-AU, 4.februar 2019. Oppdatert reglement; sjå side 3 i dette dokumentet.

Spørsmål og innspel i FN-AU, 4.februar 2019:1) Bør det etablerast eit arbeidsutval til dei ulike politiske hovedutvala?

Det vert gjeve fast godtgjersle både til leiar og nestleiar av hovudutvala. Prosjektleiar ser det difor ikkje som naudsynt med godtgjersle til eigne arbeidsutval.

Dette vert i tilfelle å vurdere i arbeidet med reglement for folkevalde organ.

2) Jf. punkt 3.3 i reglementet, bør det vere anna godkjent dokumentasjon i tillegg til likningsattest for sjølvstendig næringsdrivande?

Sjølvstendig næringsdrivande kan dokumentere inntektstapet dersom det er større enn satsen for ulegitimert tap. Godkjent dokumentasjon er då likningsattest for det siste året, alternativt gjennomsnittet av likningsattestane for dei siste tre åra. Dersom ein ikkje kan dokumentere inntekta, kan ein bruke ulegitimert sats.

3) Reiseavstanden for å få dekka overnatting er noko lang. Det må ligge ein viss fleksibilitet i punkt 6.2.

I høve reiseavstand vil prosjektleiar presisere at når fylkeskommunen dekker overnatting, vil det gå fram av innkallinga til dei fylkeskommuneale møta. Utover det gjeld kulepunkta i punkt 6.2.

4) Er det betre å redusere den fast godtgjersla til fylkesutvalsmedlemene, og heller utbetale vederlag for tapt arbeidsinntekt.

Jf. pkt. 1.4 i reglementet vil fylkesutvalsmedlemene ikkje få tapt arbeidsforteneste, men vert kompensert gjennom den faste godtgjersla. Dette meiner prosjektleiar er eit betre alternativ då den enkelte slepp å

krevje vederlag for tapt arbeidsinntekt. I tillegg vert faste godtgjersler meldt inn i KLP og er pensjonsgivande. Vidare vil prosjektleiar gjere fellesnemnda merksam på at reglementet legg opp til at folkevalde som vert rekna for å vere frikjøpt med grunnlag i minst 50% av stortingsrepresentantane si godtgjersle har nokre særskilte rettigheitar, jf. pkt. 8.5 og 8.6. Ein reduksjon i godtgjersla vil gjere at ein ikkje kjem inn under desse punkta.

5) I høve punkt 1.6 i reglementet, kva er meint med at tilkjende ytingar frå NAV vert å betale attende til Vestland fylkeskommune?

Prosjektleiar vil komme attende til nærmare forståelse og rutinar rundt praktiseringen av dette punktet i reglementet.

Prosjektleiar tilrår følgjande endringar i reglementet:

- Punkt 6.2 vert endra slik at ein er tydlegare på at kulepunkta gjeld utover det som kjem fram av innkallingar til dei fylkeskommunale møta. Vidare vert siste kulepunkt endra til fylkesordføraren tolkar regelverket og kan gjere unntak.
- Prosjektleiar vil gjere merksam på ein feil i både saksframstillinga og i vedlagde reglement for godtgjersle og arbeidsvilkår for folkevalde i Vestland fylkeskommune knytt til saksordførar. Saksordførar er nemnt i opplistinga over kven som skal ha faste godtgjersler. Fast godtgjersle til saksordførar har i prosessen vore vurdert, men vert ikkje føreslått i det nye reglementet. Prosjektleiar viser til at grunnlaget for godtgjersle til dei folkevalde er auka, særleg for gruppeleiarar, fylkesutvalsmedlemer, leiar av hovudutval og kontrollutval. Prosjektleiar tilrår derfor at det ikkje er naudsynt med ei særskilt godtgjersle til saksordførar for å dekke avgrensa oppgåver og funksjonar som folkevald. Som ein konsekvens av dette foreslår prosjektleiar at saksordførar utgår i det endelege reglementet. I kva grad og kva form rolla som saksordførar eventuelt skal vidareførast vil bli eit spørsmål i prosessen med utarbeiding av reglement for folkevalde organ.

REGLEMENT FOR GODTGJERSLE OG ARBEIDSVILKÅR FOR FOLKEVALDE I VESTLAND FYLKESKommUNE

Reglementet har til føremål å sikre folkevalde kompensasjon for sin arbeidsinnsats, erstatning for tapt arbeidsinntekt og dekking av reelle utgifter i samband med utøving av vervet.

Reglementet gjeld for folkevalde og andre medlemar av fylkeskommunale organ. I tillegg gjeld reglementet for fylkeskommunane sine tillitsvalde i fylkeskommunale organ.

Reglementet er utarbeidd med grunnlag i den nye kommunelova kapittel 8.

Det vert vist til punkt 14 i dette reglementet for satsar for godtgjersler og vederlag, samt regulering av satsar.

1. FASTE GODTGJERSLER

Følgjande folkevalde skal ha faste godtgjersler:

- Fylkesordførar
- Fylkesvaraordførar
- Fylkestingsmedlemene
- Fylkesutvalsmedlemene
- Leiarane for hovudutvala og kontrollutvalet
- Nestleiarane for hovudutvala og kontrollutvalet
- Hovudutvalsmedlemene
- Kontrollutvalsmedlemene
- Leiarane for:
 - Yrkesopplæringsnemnda
 - Fylkesrådet for eldre
 - Fylkesrådet for menneske med nedsett funksjonsevne
 - Medverknadsorganet for ungdom
 - Trafikktryggingsutvalet
 - Styret for fagskuleutdanninga

1.1. Fylkesordførar

Godtgjersla vert fastsett for kvar valperiode av det konstituerande fylkestinget.

1.2. Fylkesvaraordførar

Godtgjersla er sett til stortingsrepresentantane si godtgjersle.

1.3. Andre folkevalde

Godtgjersla til folkevalde, med unntak av fylkesordførar, vert berekna med grunnlag i stortingsrepresentantane si godtgjersle.

Folkevalde kan ha fleire ulike funksjonar og dermed krav på godtgjersla som høyrer til kvar enkelt funksjon. Likevel skal ikkje summen av faste godtgjersler overstige fylkesvaraordførar si godtgjersle.

1.4. Godtgjersle til ulike politiske funksjonar og roller

Fylkesutvalsmedlemene, leiarane for hovudutvala og kontrollutvalet og gruppeleiarane for partigruppene i fylkestinget vert frikjøpte i si rolle. Det inneber at ein mottek ei fast godtgjersle i staden for dekning av tapt arbeidsinntekt og arbeidsgodtgjersle, jf. kommunelova § 8-5.

Fylkesutvalsmedlem

Som fylkesutvalsmedlem vert ein frikjøpt med grunnlag i 50 % av stortingsrepresentantane si godtgjersle. Funksjonen som fylkesutvalsmedlem inneberer at ein også sit i eit hovudutval. Godtgjersla som fylkesutvalsmedlem skal også dekke rolla som hovudutvalsmedlem. Fylkesutvalsmedlemene får difor ikkje fast godtgjersle som hovudutvalsmedlem, møtegodtgjersle eller vederlag for tapt arbeidsinntekt for møte i hovudutvala. Viss ein vert nestleiar i eit hovudutval får ein ei ytterlegare godtgjersle på 5 % av grunnlaget.

Leiarane for hovudutvala og kontrollutvalet

Som leiar i eit av hovudutvala eller kontrollutvalet vert ein frikjøpt med grunnlag i 50 % av stortingsrepresentantane si godtgjersle. Funksjonen som leiar inneberer at når ein møter i kraft av rolla som hovudutvalsleiar eller kontrollutvalsleiar får ein ikkje utbetalt møtegodtgjersle eller vederlag for tapt arbeidsinntekt.

Gruppeleiarane for partigruppene i fylkestinget

Gruppeleiarane i partia vert frikjøpt med grunnlag i 20 % - 50 % av stortingsrepresentantane si godtgjersle. Gruppeleiarane si godtgjersle vert differensiert i tre intervall etter tal representantar i fylkestinget. Rolla som gruppeleiar inneber å leie og koordinere det politiske arbeidet som partigruppa utøver i fylkestinget. Godtgjersla dekker møtegodtgjersle, vederlag for tapt arbeidsinntekt, førebuing og deltaking i møter, konferanse, synfaring m.m.

Dersom fylkesvaraordførar er gruppeleiar, vert gruppeleiar godtgjersla overført til partigruppa. I slike tilfelle fordeler partigruppa midlane sjølve. Godtgjersla vert utbetalt på grunnlag av gruppeleiar sin attestasjon.

1.5. Frikjøp tilsvarende heil stilling

Fylkesordførar og fylkesvaraordførar og andre folkevalde som i sum har faste godtgjersler tilsvarende 100 % av stortingsrepresentantane si godtgjersle skal reknast for å vere 100% frikjøpte.

Det inneber at godtgjersla er ei totalgodtgjersle som omfattar fast godtgjersle, møtegodtgjersle og vederlag for tapt arbeidsinntekt for alle verv vedkomande har, der valet eller oppnemninga er resultat av direkte vedtak i eit fylkeskommunalt vedtaksorgan.

1.6. Reduksjon i fast godtgjersle

Dersom ein representant har fråvær i meir enn 25% av møta, vert den faste godtgjersla redusert tilsvarende det totale fråværet. Dersom fråværet skuldast anna fylkeskommunal verksemd, sjukdom, fødsels- og adopsjonspermisjon vert det ingen reduksjon i den faste godtgjersla. Fylkeskommunen betalar likevel ikkje godtgjersle lengre enn 12 mnd. Føresetnaden er at ein har teke til i vervet.

Godtgjersle utbetalt under sjukdom eller fødsels- og adopsjonspermisjon, jf. avsnittet ovanfor, skal samordnast med eventuelle ytingar frå NAV. Tilkjende ytingar frå NAV vert å betale attende til Vestland fylkeskommune.

Grunnen til fråværet skal opplysast og dokumenterast. Fylkesordføraren avgjer om fråværet skal telje med i «25% -regelen» i tvilstilfelle. Godtgjersla vert i alle høve ikkje betalt utover den perioden ein er vald for.

Dersom fylkesutvalet/hovudutvalet har samrådingar, synfaringar, temamøte eller liknande dagen før eller etter eit møte med sakshandsaming, vert også denne dagen rekna som møtedag i høve til «25%-regelen».

1.7. Fast godtgjersle til varamedlem

Varamedlem som møter i meir enn 25% av møta får prosentvis fast godtgjersle i høve til frammøte. Det vert då ikkje betalt møtegodtgjersle. Det same gjeld for nestleiarar som fungerer for leiar med fast godtgjersle. Det vert føreteke ei avrekning mot slutten av året for dei representantane dette er aktuelt for.

2. MØTEGODTGJERSLE

2.1. Møtegodtgjersle

Møtegodtgjersle for representantar i fylkeskommunale organ vert utbetalt for kvar møtedag i same organ.

Representantane som har fast godtgjersle har ikkje krav på møtegodtgjersle for møte i det utvalet ein har fast godtgjersle i, eller når ein møter i kraft av si stilling som til dømes hovudutvalsleiar, fylkesutvalsmedlem, gruppeleiar m.m. Varamedlemer har krav på møtegodtgjersle.

Fylkesutvalmedlemene får ikkje møtegodtgjersle for møte som følgjer av fylkesutvalet sine andre roller og funksjonar. Leiarane av hovudutvala og kontrollutvalet får ikkje møtegodtgjersle for møte der dei møter i eigenskap av hovudutvalsleiar/kontrollutvalsleiar. I begge tilfella gjeld dette møte i finans- og planutval..

Valde representantar til m.a. årsmøte, generalforsamlingar, arbeidsgrupper, styringsgrupper, interkommunale utval m.m. får utbetalt møtegodtgjersle med 50 %, når slik godtgjersle ikkje vert betalt av andre.

2.2. Fleire møte same dag

Dersom folkevalde møter i fleire utval same dag, har dei rett på ei møtegodtgjersle per utval.

2.3. Dobbelt møtegodtgjersle

Utvalsleiarar som ikkje har fast godtgjersle får dobbelt møtegodtgjersle.

Nestleiar eller andre, som ikkje har fast godtgjersle, som må leie heile møte i leiaren sitt fråvær får dobbelt møtegodtgjersle.

2.4. Arbeidstakarrepresentantar

Arbeidstakarrepresentantar i folkevalde organ har same rettar til godtgjersle etter regulativet som dei folkevalde medlemene av organet.

Møtegodtgjersle vert ikkje gitt til arbeidstakarar som møter i kraft av si stilling.

2.5. Presiseringar

Møtegodtgjersle vert gitt til mellom anna:

- Varamedlemer i fylkestinget, fylkesutvalet, hovudutvala og kontrollutvalet.
- Møtande medlem og varamedlemer i Vestlandsrådet
- Møtande representantar til m.a. årsmøte og generalforsamlingar
- Møtande medlemer og varamedlemer i andre råd og utval (t.d. fylkesråd for eldre, fylkesråd for menneske med nedsett funksjonsevne, medverknadsorgan for ungdom, fagopplæringsnemnda, trafikktryggingsutvalet)

3. VEDERLAG FOR TAPT ARBEIDSINNTEKT

Folkevald skal ha vederlag for tap av inntekt som følgje av tillitsvervet.

Det gjeld *ein* sats for legitimert tap og *ein* sats for ulegitimert tap, jf. punkt 14. .

Dersom det ikkje ligg føre dokumentasjon på inntektstapet, vert vederlaget gitt etter satsen for ulegitimert tap, såframt tapet er sannsynleggjort

Vederlag kan gjevast til arbeidstakarar, sjølvstendig næringsdrivande og personar utan arbeidsinntekt dersom dei må forsøme sine ordinære gjeremål for å ivareta tillitsvervet, t.d. heimeverande, studentar og pensjonistar.

Fylkesrådmannen avgjer i kvart tilfelle om det ligg føre faktisk inntektstap.

3.1. Unntak

Gruppeleiarane, fylkesutvalsmedlemene, leiarane i hovudutvala og kontrollutvalet får ikkje betalt vederlag for tapt arbeidsinntekt når dei møter i eigenskap av rolla si, jf. pkt. 1.4.

Fylkesutvalsmedlemene får ikkje vederlag for tapt arbeidsinntekt for møte som følgje av fylkesutvalet sine spesielle funksjonar, t.d. funksjonen som finansutval og fylkesplanutval.

3.2. Personar med lønsinntekt

Tapt arbeidsinntekt skal dekkast ved at arbeidsgivar fakturerer kommunane/fylkeskommunane direkte for fråvær, for å hindre at folkevalde taper pensjon.

3.3. Sjølvstendig næringsdrivande

Dersom inntektstapet er større enn satsen for ulegitimert tap, kan inntektstapet dokumenterast med likningsattest for det siste året. Som alternativ kan ein ta utgangspunkt i gjennomsnittet for likningsattestane for dei tre siste åra.

Kapital- og pensjonsinntekter som kjem inn uavhengig av eige nærver på arbeidsplassen vert ikkje medrekna i grunnlaget. Det er den pensjonsgivande inntekta med fråtrekk for godtgjersla folkevalde har fått utbetalt frå fylkeskommunen som skal leggest til grunn.

Inntektstapet pr. dag vert utrekna etter netto årsinntekt dividert på 260 dagar.

3.4. Personar utan lønsinntekt

Denne gruppa får dekka tap tilsvarande satsen for ulegitimert tap.

3.5. Folkevald tilsett i fylkeskommunen

Folkevald som er tilsett i fylkeskommunen får utbetalt si ordinære løn i fylkeskommunen.

Ved fråvær utover 10 dagar per år kan vedkomande institusjon krevje refusjon for ev. vikarutgifter. Refusjonskrav vert å sende fylkesrådmannen.

4. GODTGJERSLER VED DELTAKING PÅ GRUPPEMØTE, KURS, SYNFARING OG LIKNANDE.

4.1. Gruppemøte

Gruppemøte som vert haldne i fylkestingsgruppene før opninga av fylkestinget vert rekna som ein del av fylkestingsmøtet og gir ikkje grunnlag for eigne godtgjersler.

4.2 Kurs, konferanse o.l.

Ved deltaking på kurs, konferansar, folkemøte og liknande vert det vert gitt vederlag for tapt arbeidsinntekt og skyss-, kost- og opphaldsgodtgjersle. Det vert ikkje gjeve møtegodtgjersle. Det vert ikkje betalt vederlag for tapt arbeidsinntekt dersom ein deltek i eigenskap av rollene nemnt under punkt 1.4.

Slik deltaking skal vera avtala og godkjent av fylkesordførar eller utvalsleiar.

4.3. Synfaringar o.a. arbeid utanfor møta

Ved deltaking på synfaringar og anna arbeid utanfor møta som vert gjort av det samla utvalet, vert det gitt møtegodtgjersle, vederlag for tapt arbeidsinntekt og skyss-, kost- og opphaldsgodtgjersle. Dette gjeld likevel ikkje for rollane nemnt under pkt. 1.4.

Det same gjeld når utvalet, fylkesordførar eller fylkesrådmannen har bede om at ein eller fleire medlemmer føretek synfaring.

5. VEDERLAG FOR PÅFØRTE UTGIFTER

5.1. Utgifter i samband med tilsyn til barn under 12 år, funksjonshemma, eldre og sjuke

Folkevalde skal ha vederlag for påførde utgifter som følgje av ombodet. Det gjeld ein sats for legitimerte utgifter og ein sats for ulegitimerte utgifter, jf. pkt. 14.

Dersom det ikkje ligg føre dokumentasjon på utgiftene, vert det gitt etter satsen for ulegitimert tap såframt utgiftene er sannsynleggjort. Det er i alle høve ein føresetnad at det ligg føre eit økonomisk tap.

Aktuelle utgifter vil m.a. kunne vere utgifter til stadfortredar, tilsyn til barn under 12 år og funksjonshemma, samt stell av sjuke og eldre.

Vederlag for påførde legitimerte utgifter vert dekka inntil eit visst beløp, jf. pkt. 14. I slikt tilfelle skal alderen på barnet og at tilsynet har funne stad dokumenterast. Det er ein føresetnad at omsorgsansvaret elles ville ha hindra den folkevalde i å delta i møtet.

6. SKYSS- OG KOSTGODTGJERSLER M.M.

Dei folkevalde skal ha skyss-, kost- og opphaldsgodtgjersle etter det kommunale reiseregulativet ved møte eller oppdrag på vegner av fylkeskommunen.

6.1. Skyssgodtgjersle

Den folkevalde får dekkja reiseutgifter frå heimstaden/arbeidsstaden.

Dersom den folkevalde på grunn av utdanning, verneplikt, jobb eller liknande oppheld seg ein annan stad enn heimstaden, vert det dekkja reiseutgifter til og frå den staden ein oppheld seg som følge av dette. Fylkesordførar kan i særskilte tilfelle gjere unntak frå dette.

Det er høve for fylkeskommunale folkevalde representantar å nytte eige skyssmiddel for reiser til og frå møte.

6.2. Overnattingsgodtgjersle

Når det vert lagt opp til at overnatting vert dekkja av fylkeskommunen, vil dette gå fram av innkallinga til dei fylkeskommunale møta.

Utover det dekkjer fylkeskommunen overnatting:

- Når fylkeskommunale møte eller møte representanten deltek på som fylkeskommunal folkevald/på vegne av fylkeskommunen går over fleire døger, eller representanten må møte på møte påfølgjande dag og reiseavstand til heimen er på minst 150 km med bil eller minst 2,5 time reise med kollektive transportmiddel (målt etter www.vegvesen.no/trafikk hjå Statens vegvesen).
- Når det ikkje er praktisk mogeleg å komme seg heim med kollektiv reise, eller at heimreise medfører urimeleg lang tidsbruk for representanten dersom representanten skal på fylkeskommunale oppdrag neste dag.
- Dersom møtet varer så lenge ut over kvelden at representanten ikkje kan nå heim same dag.
- Reglane gjeld tilsvarande for gruppemøte før fylkestingsmøte.
- Fylkesordføraren tolkar regelverket og kan gjera unntak.

7. UTGIFTER TIL TELEFON OG BREIBAND

7.1. Telefon

Fylkeskommunen held mobiltelefon for fylkesordførar og fylkesvaraordførar, og dekkjer alle utgiftene ved abonnementet, jf. elles fylkeskommunen sitt telefonreglement så langt det passar.

Fylkestingsmedlemene elles og leiaren for kontrollutvalet får ei fast telefongodtgjersle pr. år, jf. punkt 14.

7.2. Breiband

Fylkestingsmedlemene og leiaren for kontrollutvalet skal ha ei årleg godtgjersle til dekking av utgifter til breiband, jf. punkt 14. Dei ordnar sjølve med tinging og vedlikehald av breibandet.

8. PENSJONSMEDLEMSKAP, FORSIKRINGAR OG PERMISJON

8.1. Medlemskap i KLP

Folkevalde skal ha medlemskap i Kommunal Landspensjonskasse (KLP).

8.2. Tap av pensjonsrettar

Folkevald som vil tape pensjonsrettar som følgje av redusert stilling/fråvær frå sitt ordinære arbeid får refundert arbeidsgivardelen av den tilleggspremie som må betalast for å oppretthalde pensjonsmedlemskapen.

Det vert ikkje gitt refusjon når pensjonsmedlemskap knytt til det politiske vervet minst kompenserer for det tap i ytingar som manglande innbetaling av tilleggspremie vil resultere i. Ved berre delvis tap i ytingar etter ei slik samordning skjer det ei høvesvis avkorting i refusjon av tilleggspremie.

8.3. Gruppelivsforsikring

Folkevalde som er medlem i pensjonsordninga i KLP er også dekkja av fylkeskommunen si gruppelivsforsikring som har heimel i Hovudtariffavtalen kap. 1, § 10.5

8.4 Reiseforsikring

Det er teikna reiseforsikring for folkevalde. Ordninga gjeld for reiser som følgje av vervet, og kun desse.

8.5 Yrkesskade

Folkevalde som er frikjøpt med grunnlag i minst 50 % av stortingsrepresentantane si godtgjersle skal ha same rett til ytingar ved yrkesskade som dei tilsette i fylkeskommunen.

8.6 Permisjon

Folkevalde som er frikjøpt med grunnlag i minst 50 % av stortingsrepresentantane si godtgjersle kan få permisjon i samsvar med arbeidsmiljølova §§12-1 til 12-10, 12-12 og 12-15. Under permisjonen beholder den folkevalde godtgjersla i inntil to veker, med mindre ein gir avkall på den.

Under svangerskapspermisjon, omsorgspermisjon, fødselspermisjon, foreldrepermisjon og permisjon ved barn - og barnepassar sin sjukdom har den folkevalde rett til å behalde godtgjersla etter dei same reglane som dei tilsette i fylkeskommunen.

9. ORDNINGAR FOR FYLKESORDFØRAR, FYLKESVARAORDFØRAR OG HOVUDUTVALSLEIARANE

9.1. Husvære

Fylkeskommunen skal etter behov syte for høveleg husvære og dekkjer dei faste utgiftene med leige, straum m.m.

9.2. Dekking av spesielle reiseutgifter, m.v.

Fylkestinget skal fastsette særskilte reglar for dekking av reiseutgifter til og frå heimstaden på bakgrunn av kven som innehar vervet og kva som er rimeleg i det enkelte tilfellet. Skyss- og kostgodtgjersle vert gjeve etter det kommunale regulativet.

10. POLITIKARDAGAR

Leiarar/medlemer i andre utval som ikkje er medlemer i fylkestinget skal ha høve til å møte på politikardagar dersom det er aktuelle saker som vedkjem deira utval. Dei skal då få dekkja utgiftene til reise, overnatting, møtegodtgjersle og eventuell kompensasjon for tapt arbeidsinntekt. Fylkesordføraren avgjer i tvilstilfelle.

11. ETTERGODTGJERSLE

Folkevald som er frikjøpt med grunnlag i minst 50 % av stortingsrepresentantane si godtgjersle og som ikkje vert attvald, som fråtrer vervet eller som får vervet redusert, kan søke om å få ettergodtgjersle slik:

- Folkevald som ikkje har arbeid å gå til får ettergodtgjersle i tre månader.
- Folkevald som har arbeid å gå til får ettergodtgjersle i ein og ein halv månad.

Ettergodtgjersla skal vere lik den faste godtgjersla vedkomande hadde, ev. differansen mellom denne og ny godtgjersle.

12. INNLEVERING AV REISEREKNING M.V.

Reiserekning med krav om godtgjersler og vederlag skal leverast seinast tre månader etter at møtet er halde.

Fylkesrådmannen avgjer om vesentleg brot på denne fristen skal medføre at reiserekninga ikkje vert godkjent.

Eventuelt utbetalt reiseforskot vert trekt ved oppgjeret av reiserekninga.

13. FRIKJØPSORDNINGA

Stønad til frikjøp for politisk arbeid vert gjeve til partigruppene i fylkestinget med 25 000,- per fylkestingsrepresentant per år. Frikjøpsmidlane vert utrekna og fordelt på fylkestinget sine medlemer, med unntak av fylkesordførar, fylkesvaraordførar, hovudutvalsleiarane, kontrollutvalsleiar og gruppeleiarane.

Partigruppene fordeler midlane sjølve. Stønaden vert utbetalt på grunnlag av gruppeleiararen sin attestasjon.

Når fylkeskommunen føretek utbetaling direkte til eit medlem vert dette registrert som honorar, og det vert trekt skatt og rekna arbeidsgivaravgift av beløpet.

14. REGULATIV FOR GODTGJERSLER OG VEDERLAG TIL FOLKEVALDE

Folkevalde vert rekna som 100 % frikjøpt når ein i sum har godtgjersle tilsvarande 100 % av stortingsrepresentantane si godtgjersle. Godtgjerslene er rekna med eit grunnlag pr. 1.5.2018 på 956 500 kr. Dei faste godtgjerslene vert regulerte i tråd med stortingsrepresentantane si årlege lønsregulering pr. 1. mai. Godtgjersler og vederlaga vert elles regulerte per 1.mai i samsvar med årslønsveksten i det kommunale tariffområdet.

Dei nye satsane vert slik:

1. Faste godtgjersler per år:

	%-sats	Beløp
fylkesordførar		kr 1 300 000
fylkesvaraordførar		kr 956 500
Fylkesutvalsmedlem	50 %	kr 478 250
Leiar i hovudutvala	50 %	kr 478 250
Leiar i kontrollutvalet	50 %	kr 478 250
Nestleiarane i hovudutvala og kontrollutvalet	10 %	kr 95 650
Fylkestingsmedlem	5 %	kr 47 825
Hovudutvalsmedlem og kontrollutvalsmedlem	5 %	kr 47 825
Leiar yrkesopplæringsnemnda	3 %	kr 28 695
Leiar for trafikktryggingsutvalet	3 %	kr 28 695
Leiar for styret for fagskuleutdanninga	3 %	kr 28 695
Leiar for fylkesråd for eldre	3 %	kr 28 695
Leiar for fylkesråd for menneske med neds. funksj.	3 %	kr 28 695
Leiar for medverknadsorganet for ungdom	3 %	kr 28 695
Gruppeleiarar		
inntil 5 medlem i FT	20 %	kr 191 300
frå 6-9	35 %	kr 334 775
10 eller meir + opposisjonsleiar	50 %	kr 478 250
Telefon og breiband godtgjersle		kr 5 400
Frikjøpsordning		kr 25 000

2. Godtgjersler og vederlag per møtedag:

		Beløp
Møtegodtgjersle		kr 1 400
Vederlag for ulegitimert tap i inntekt		kr 1 500
Vederlag for legitimert tap i inntekt	inntil	kr 4 000
Vederlag for påførde ulegitimerte utgifter		kr 700
Vederlag for påførde legitimerte utgifter	inntil	kr 1 500

[... Sett inn saksutredningen over denne linja ↑](#)